



Inatsisartunut ilaasortaq, Gerth Mikaelson,
Maani/

§ 37 naapertorlugu apeqquteqaammut nr. 033-mut akissut

19-05-2025

Inatsisartut suleriaasianni § 37, imm. 1 naapertorlugu Tasiilami nannuttassat pillugit Naalakkersuisunut apeqquteqarsimavutit. Apeqqut suliaasaqarfigisannit akineqartussanngorlugu innersuunneqarpoq.

Suliap normua: 2025 - 10465
All. nr. 25358115

Apeqqutigineqartut tulleriaarsimaneri malillugit akissutit suliarineqarput:

Postboks 269
3900 Nuuk

Oqarasuaat (+299) 34 50 00
Fax (+299) 34 63 55
E-mail: apn@nanoq.gl
www.naalakkersuisut.gl

1-imut. Tasiilami eqqaanilu nannunik piniarfiit immikkoortortat 1, 2, 3-ngorlugit inissinneqartuupata qanormita Naalakkersuisut eqqarsaatersuuteqarpat?

Akissut:

Kalaallit Nunaanni massakkut sumiiffinnut killeqarfiit aallaaviatigut uumassusilerituut siunnersuisimaneriniq aallaaveqartarput. Tunumi sumiiffinnut killeqarfiit sulii eqqunneqanngillat uumassusilerituut tunngaviusumik nalunaarusiaat utaqqimaarneqarmat. Sumiiffiit killeqarfiit agguataarsimaneri Tunumi nannuttassatut uumassusilerituunit siunnersuisoqarsimannginnerata kingunerisaanik nannunik aqutsinissaq eqqarsaatigalugu suliarineqarsimasut allanngortinneqarsinnaapput.

Nalunaarummi atuuttumi § 6 innersuussutigissavara, ilanngussaq 1. Nannut sumiiffinnut nalinginnaasumik agguataagaasarput, taakkulu ilanngussaq 1-imu ersarissarneqarsimapput, ilanngussaq ilanngullugu nassiunneqartoq takujuk. Nunap immikkoortuata killeqarfiata iluani pisassiissutit kommunikkaarlugit, aqutsiveqarfikkaarlugit nunaqarfikkaarlugilluunniit agguarneqarsinnaapput. Uumasogatiguit nunap immikkoortuini qanoq killeqarfeqarnerat pillugu ilisimasat nutaanerpaat tunngavigalugit piniarfissat aalajangersarneqassapput. Taamaattorli nunap immikkoortukkaarlugit piniarfissat akimorlugit piniartoqaqqusaanngilaq, tak. ilanngussaq 1.

Tunumi piniarfissanik aalajangersaanissani, tamanut tusarniutigineqartussaajumaartunut, nalunaarusiaq siuliani taaneqartoq Naalakkersuisunit utaqqimaarneqarpoq.

2-mut. Naalakkersuisut Tasiilami eqqaanilu nannuttassat amerlineqarnissaannut pilersaaruteqarpat?

Akissut:

Tasiilami eqqaanilu nannuttassanik amerliliiinissamik Naalakkersuisut pilersaaruteqanngillat. 2025-mi nannuttassanut tamarmiusunut pisassat agguarneqarsimaneri innersuussutigineqarput.

3-mut. Qulaani taaneqartuni Naalakkersuisut pilersaaruteqanngipata, qanoq ilillugu piniartut nannunik pisassat nungukkaangata pisaqaaqusaajunnaartarneri, Naalakkersuisut taarsiissummik aningaasatigut ikiorsiisarniarpat?

Akissut:

Nannuttassat tamakkerlugit pisarineqareernerisa kingorna aningaasatigut taarsiissuteqarnissamik Naalakkersuisut pilersaaruteqanngillat. Nannuttassat nungutsillugit Aningaasanut Inatsit, Inatsisartut inatsisaat tassunga ilaalluni Nannunik illersuineq piniarnerlu pillugit Namminersorlutik Oqartussat nalunaarutaat aqutugalugit taarsiissuteqartoqarsinnaanngilaq.

Inussiarnersumik inuulluaqqusillunga



Peter Borg

Aalisarnermut, Piniarnermut Nunalerinermut Imminullu pilersornermut Naalakkersuisoq

Ilanngussaq 1

Umasoqatigiit killeqarfiinut takussutissiaq

